

Կարծիք

Հարություն Գեորգիի Սելիմյանի «Դավանական նոր իրավիճակը և ըմբռնումները՝ ըստ 19-րդ դարի 40-50-ական թթ.ավետարանական մամուլի (Կ. Պոլիս, Զմյուռնիա), Թ.00.05 «Կրոնի տեսություն և պատմություն»(պատմական գիտություններ)» մասնագիտությամբ պայմանական գիտությունների թեկնածուի գիտական աստիճանի հայցման ատենախոսության վերաբերյալ:

Հայտնի իրողություն է, որ 19-րդ դարի 40-50-ական թ.թ. Արևմտյան հայ իրականության մեջ ազգային ոգու արթնացման ժամանակաշրջան էր,որին նպաստեցին Օսմանյան կայսրությունում 1839թ. սկսած թանգիմաթի բարեփոխումները,ոչ մահմեդական քաղաքային բնակչության հասարակական կյանքի աշխուժացման գործում և նպաստեցին արևմտահայության մեջ լուսավորչական շարժման ծավալմանը: Բացի այդ դրան նպաստեց նաև 19-րդ դարի 30-50-ական թ.թ. համաեվրոպական ազգային ազատագրական ,հեղափոխական շարժման վերելքը, որը լայն արձագանք գտավ հայ իրականության մեջ, հատկապես արևմտահայ մամուլում :

1840թ. սկզբնավորված արևմտահայ ազգային պարբերական մամուլը մեծ մասամբ աչքի ընկավ ազգանվեր գործունեությամբ: Այդպիսի գործունեությամբ հատկապես աչքի ընկավ 1840թ. Կ. Պոլսում, Ամերիկայում կրթություն ստացած Խաչատուր Ոսկանյանի հիմնադրած «Ազդարար Բյուզանդյան» և Ղուկաս Պալթազարյանի Զմյուռնիայում հիմնադրած «Արշալույս Արարատյան» աշխարհաբար լեզվով հրատարակված շաբաթաթերթի կողքին լույս տեսած «Շտեմարան պիտանի գիտելեաց» պարբերականը, որպես առաջին կրոնաթերթ , որպիսին մինչ այդ չէր եղել արևմտահայ իրականության մեջ: Նրան 1854թ. փոխարինեց «Ավետաբեր և Շտեմարան պիտանի գիտելեաց» երկշաբաթաթերթը: Հենց այս կրոնաթերթերի և «Բազմավեպ» և «Արձագանք» հանդեսների նյութերի հետազոտությունն էլ կազմել է ատենախոսության թեմայի ընտրության հիմքը, որի վերլուծությամբ էլ ատենախոսը ներիկայացրել է արևմտահայ իրականության մեջ

դավանական կարգավիճակի և ըմբռնումների խորապատկերը և կրոնական իրականությունը :

Ատենախոսը առաջին անգամ փորձ է արել համակողմանի ու համապարփակ քննության ենթարկել հետազոտվող թեման: Թեմայի ուսումնասիրությունը լուսաբանվել է մի շարք դավանական, հոգևոր, մշակութային, կրոնաբարոյական, ազգային, մարդասիրական նոր ընկալումների ու մոտեցումների , ըստ ժամանակի մամուլի նպատակային ուղեգծի , որը հնարավորություն է տվել ուրվագծել այդ ժամանակաշրջանի պոլսահայ հոգևոր կյանքը իր բնորոշ կողմերով ու առանձնահատկություններով՝ համեմատելով արդի պոլսահայ հոգևոր կյանքի որոշ հանգամանքների հետ:

Աշխատանքի ներածականում ատենախոսը քննարկել է ատենախոսության նպատակներն ու 7 կետից բաղկացած խնդիրները:

Ուսումնասիրության նպատակն է պոլսահայ նշված ժամանակաշրջանի կրոնական մամուլի ուսումնասիրությամբ և վերլուծությամբ ներկայացնել Հայ Ավետարանական եկեղեցու բարեկարգման ազդեցությամբ ձևավորված նոր դավանաբանական մոտեցումներն ու ընկալումները՝ պոլսահայ հոգևոր-մշակութային տիրույթի մեջ:

Ատենախոսության խնդիրներն են

Ա) Պոլսահայ ժամանակի կրոնական մամուլի քննությամբ ցույց տալ բարեկարգության ազդեցությունը դավանաբանական համակարգի վրա:

Բ) Ուսումնասիրել այդ շրջանի Հայ Ավետարանական եկեղեցու կազմակերպումը դավանաբանական հիմքի վրա, հայկական կյանքի ազատականացման միտումներն ու խորացումները:

Գ) Լուսաբանել այդ շրջանի կրոնական մամուլի մոտեցումները և դրանորումները վերոնշյալ խնդիրներ ձևակերպման և լուծման ուղղությամբ:

Դ) Ուրվագծել այդ շրջանում ձևավորված դավանական նոր իրավիճակը:

Ե) Սահմանել դավանական նոր մոտեցումները՝ ընդգծելով նրանց բնորոշ կողմերը:

Զ) Անդրադառնալ այդ շրջանի ավետարանական ազատականության վախճանաբանական, աստվածաբանության, կրոնաբարոյական ուսմունքներին, քննելով դրանք ազգային այլ խնդիրների՝ քրիստոնեության և քաղաքակրթության շրջանակներում:

Է) Լուսաբանել կրոնական կարևորագույն թերթերի որդեգրած ուղեգիծը բարեկարգության հարցերում:

Ատենախոսը փաստերը հետազոտելու և մեկնաբանելու համար, առավելապես կիրառել է պատմաքննական, համադրական գուգադրական, համեմատական փաստերի և իրադարձությունների հետադարձ քննության մեթոդները: Գլխավոր գիտական նորույթն այն է, որ քննության են ենթարկվում Հայ Ավետարանական եկեղեցու դավանական հիմքի վրա կազմված բոլոր նախադրյալները, տիրող պայմանները և այն հանգեցնող պատճառները: Ատենախոսության առանձին դրույթներ ու եզրակացություններ ունեն գործնական ու կիրառական նշանակություն, քանզի դրանք կարող են օգտագործվել բուհական կրթական համակարգի մեջ՝ հայ եկեղեցու ուսումնասիրությանը ուղղված դասընթացների կրթական ծրագրերում, ինչպես նաև մամուլի, գլխավորապես կրոնական պատմության ուսումնասիրության գործի բնագավառում:

Ատենախոսության լույսի ներքո կարելի է վերանայել և նորովի ուսումնասիրել այդ շրջանի պոլսահայ հոգևոր կյանքի մեջ դավանական որոշ մոտեցումներ և ըմբռնումներ:

169 մեքենագիր էջեր ընդգրկող ատենախոսությունը բաղկացած է ներածությունից, երեք գլուխներից՝ համապատասխան ենթագլուխներով, եզրակացությունից և օգտագործված աղբյուրների ու գրականության ցանկից:

Ներածության մեջ (էջ 2- 25) հիմնավորված է ընտրված թեմայի գիտական նշանակությունն ու արդիականությունը, նպատակն ու խնդիրները, ներկայացված է

աշխատանքի գիտական նորույթը, տրված է օգտագործված սկզբնաղբյուրների ու գրականության տեսությունը: Ներածության մեջ անդրադարձ է կատարվել պատմական այն նախապայմանների պատճառների և հանգամանքների լուսաբանմանը, որոնց հետևանքով ստեղծվեցին նախադրյալներ, դավանական նոր իրավիճակի ձևավորման գործում՝ պոլսահայ հոգևոր կյանքի մեջ:

Առաջին գլուխը, որը անվանվում է «Եվրոպական բարեկարգումն ու արևմտահայ ավետարանականները 19-րդ դարի 40-ական թ.թ.», ընդգրկում է 26-ից 78-րդ էջերը և բաղկացած է երեք ենթագլխից՝ «Հոգևոր ակունքները», «Հայ ավետարանական շարժումը» և «Արևմտահայոց առաջին կրոնաթերթը»: Այստեղ քննական վերլուծության է ենթարկվում բարեկարգության գաղափարախոսությունը և անդրադարձ է կատարվում բողոքականության դավանաբանության հինգ դրույթներին: Հայտնի է, որ 15-16-րդ դարերը վճռական եղան քրիստոնեական Արևմուտքի համար, քանզի նոր աշխարհի բացահայտումն ու գիտական հեղափոխության սկզբանավորումը բախտորոշ դարձան ամբողջ աշխարհի համար: Վերածննդի դարաշրջանում տեղի ունեցած սոցիալ-տնտեսական ու մշակութային փոփոխությունների ազդեցությունը կրոնական կյանքի վրա, աստենախոսը այս ոլորտում առավել կարևորում է 16-րդ դարում եվրոպական մի շարք երկրներում (Անգլիա, Ֆրանսիա, Եվեյցարիա, Հոլանդիա) սկսած կրոնական հզոր շարժումը՝ «Ռեֆորմացիան»՝ բարեկարգությունը:

Անդրադառնալով Լութերականության մեջ ձևակերպած բողոքականության հիմնական սկզբունքներին՝ «Միայն Հավատով», առանց հոգևորականության և եկեղեցու միջնորդությամբ Աստծուն հաղորդակցվելով փրկվելու գաղափարին, աստենախոսը հիմնավորում է Մարտին Լութերի և Յան Կալվինի կողմից հոգևորի վերաբերյալ տեսական մոտեցումները, բողոքականության դավանաբանության հինգ դրույթները:

Աստենախոսության հեղինակին հաջողվել է հայ ավետարանական շարժումը, ներկայացնել որպես ավետարանականների գործունեության շրդարձային

փուլ, բողոքականության փուլ, քարոզչության պատմության, Կոստանդնուպոլիսի և Օսմանյան կայսրության մեջ միսիոներական նոր «հարթության», ինչպես նաև կրոնական առաջատար թերթերի գաղափարական ուղեգծերը և Հայ Ավետարանական եկեղեցու դավանական կազմակերպման բնորոշ կողմերը: Ըստ ատենախոսի Հայ Ավետարանական շարժման արդյունքում ձևավորվում են Հայ Ավետարանական եկեղեցու դավանական նոր հիմքերը: Իբրև դրա լավագույն վկայություն նա բերում է Օսմանյան կայսրության ժամանած առաջին միսիոներների տպավորությունները այն մասին, որ կայսրության բոլոր ժողովուրդներից հայերը ամենից բացն էին բողոքական միսիոներների գործունեության հանդեպ, նպաստելով աշխարհի բարոյական վերակառուցմանը, դպրոցի և եկեղեցու հիմնադրմանը, յուրաքանչյուր ընտանիքի համար Աստվածաշունչ ընթերցելու և աղոթելու հնարավորության ստեղծմանը և այլն:

Անդրադառնալով 1830-40-ական թ.թ. հայկական իրականության մեջ ազգային ոգու վերածննդին, ատենախոսը առանձնացնում է նրանում մամուլի խաղացած դերը, հրատարակվող թերթերի ու ամսագրերի կողքին «Լրո գիր» (1832, Կոստանդնուպոլիս) «Շտեմարան պիտանի գիտելեաց» (1839, Ջմյուռնիա) «Բազմավեպ» (1843, Վենետիկ) «Ազգասեր» (1845, Կալկաթա) «Կովկաս» 1846, Թիֆլիս) «Եվրոպա» (1847 Վիեննա) և այլն. հրատարակվող առաջին կրոնաթերթին, գլխավորապես ամերիկյան բողոքականների պարբերականներին՝ ներկայացնելով նրանց դավանական ուղղվածությունները:

Վերլուծելով ամերիկյան բողոքականների հրատարակությունները՝ «Շտեմարան պիտանի գիտելեաց» (Ջմյուռնիա, 1839-1854), «Ավետաբեր» (Կ. Պոլիս, 1855-1915), «Ավետաբեր մանկանց» (Կ. Պոլիս, 1908-1915) և այլ պարբերականների դավանական գործունեությունը, ատենախոսը շեշտադրում է նրանց դրական վաստակը հատկապես հայոց լեզվի մաքրության պահպանման գործում, «հետզհետե մաքրելով ու պատրաստելով աշխարհին նոր գրականության լեզուն» (էջ 79):

Երկրորդ գլուխը (էջ 79-ից 111) «Միրո, հույսի, և մեղքի ըմբռնումները հայ ավետարանական եկեղեցու մեջ». բաղկացած է երկու ենթագլուխներից: Այստեղ ատենախոսը քննել է սիրո և հույսի թեմանները պարբերաթերթի ընկալմամբ:

Պարբերականը սահմանում է Աստծո սիրո և մարդու հանդեպ հույսի ընկալումները: Աստծո նկատմամբ սերը միակ ճշմարիտ բարիքի երկրպագությունն է, երախտագիտությունը՝ ընծաներ անողին: Իսկ մարդու նկատմամբ սերը լցված է ավելի շատ խղճահարությամբ, քան երկրպագությամբ: Ատենախոսը այստեղ դուալիզմ է նկատում՝ երկու մեծ արժեքների՝ Աստծու և մարդու նկատմամբ՝ ընդգծելով Մարդ Որդու և Աստծու Որդու երկակիությունը՝ դուալիզմը: Ատենախոսը քննական վերլուծության է ենթարկում պարբերաթերթի մեջ մեղքի, մեղսագործության ավետարանչական ընկալումները:

Վերջին երրորդ գլուխը՝ (էջ 112-153) «հոգևոր-մշակութային և ազգային կյանքի հիմնախնդիրները», բաղկացած է երեք ենթագլուխներից: Այստեղ բովանդակային վերլուծության է ենթարկվում մարդու ազատականության տեսությունը՝ ըստ ավետարանչական դավանաբանության: Սուրբ Կաթողիկե եկեղեցին հետազոտվում է՝ որպես նոր մարդկային համայնք: Հատուկ քննարկման նյութ է ատենախոսությունում քաղաքակրթության և քրիստոնեության հարաբերակցության հարցը՝ «մարտնչող եկեղեցու» ռազմավարության դիտարկմամբ: Ատենախոսը «Հոգևոր մշակույթի ըմբռնման» հարցում կատարելով բովանդակային ուսումնասիրություն, քննարկում է պարբերականների տեսական մոտեցումները՝ հոգևոր մշակույթի սահմանման վերաբերյալ, այն համարելով որպես հոգևոր կատարելագործության ամբողջություն: Ատենախոսության մեջ համակողմանի քննության է ենթարկվում քրիստոնեական ընկալումները՝ ազգի, կրոնի, դաստիարակության և կրթական համակարգի վերաբերյալ, միաժամանակ լուսաբանելով սկզբունքային կողմերը, կրոնական պարբերականների անդրադարձը այս ուղղությամբ: Այս գլխում ատենախոսը հանգում է այն եզրակացության, որ ամերիկյան միսիոներների քարոզչությունը Օսմանյան կայսրություն բերեց

ամերիկյան քաղաքակրթության հոգևոր և բարոյական որոշակի արժեքներ, որոնք հնարավորություն տվեցին հայ ժողովրդին իր բողոքի ձայնը հասցնելու եվրոպական դիվանագիտության լայն շրջանակներին (տես՝ էջ 153):

Վերջում՝ «եզրակացություններ բաժնում» ստենախոսը 6 մեքենագիր էջերի շրջանակում կատարել է ընդհանրացումներ և ներկայացրել 13 կետից բաղկացած եզրակացություններ (էջ 154-160): Ատենախոսը վերլուծելով վերոնշյալ հիմնախնդիրները հանգում է այն եզրակացության, որ

Ա) 1840-50-ական թ.թ. հայ ազգի ոգու վերածնության տարիներին Հայ Ավետարանական եկեղեցին վերջապես կազմակերպվում է դավանական հիմունքների վրա, որը խորացնում է հայկական կյանքի ազատականացման միտումները:

Բ) Արևմտահայ մամուլի աննախադեպ զարգացումը 1840-ական թ.թ. «Շտեմարան պիտանի գիտելեաց» հանդեսն ու նրան փոխարինած «Ավետաբերը» մինչև վերջ աչքի ընկան ազգանվեր գործունեությամբ, լուսաբանելով ինչպես կրոնա-դավանաբանական հարցեր, պատմաբանասիրական, կրթության և լուսավորության խնդիրները, այնպես էլ այնպիսի գործանական նշանակության հարցեր, ինչպիսիք հայոց լեզվի հարցն էր, օգտագործելով գրական հայերենի ժամանակային գրանցումները՝ սկսած գրաբարից մինչև արևմտահայ աշխարհաբարը, նրանում ներառելով նաև ռամկական-բանահյուսական տարրերը:

Գ) Օսմանյան կայսրության նկատմամբ ԱՄՆ-ի քաղաքականությունը դրսևորվեց ամերիկյան միսիոներական կազմակերպությունների գործունեությամբ, որը որոշակի դերակատարություն ունեցավ Արևմտահայության ճակատագրում, «բարեկարգությունների» ձևով նպաստեց առողջապահության ու բժշկության նոր համակարգերի կիրառելուն և մշակութային փոփոխությունների ներմուծմանը հասարակության մեջ:

Դ) Ավետարանական ազատականությունը բոլոր զգացումներից վեր է դասում սերը, որը Աստծու նկատմամբ անշահախնդիր տիեզերական էրոս է, իսկ մարդու նկատմամբ՝ մաքուր ազգայն:

Ե) Սիրո պատվիրանը հակադրվում է մեղսավորության փաստին, որը աշխարհի արարումից հետո առանցքային իրադարձություն է :

Զ) Քրիստոնեության և քաղաքակրթության հարաբերակցության հարցը ամենին նոր չէ և քրիստոնեության հակասությունները՝ այս ոլորտում մշտական են և երևան են եկել նրա գոյության ողջ ընթացքում:

Է) Արևմտյան մշակույթը դիտարկվում է իբրև քրիստոնեության ծնունդ, որքան էլ այդ տեսակետը հակամետ է առանձին տեսաբանների սկզբունքներին:

Ը) «Շտեմաբան պիտանի գիտելեաց» պարբերականը լինելով հոգևոր-կրոնական եզակի կազմակերպություն հանգամանքների բերումով ծառայություններ է մատուցել նաև «աշխարհիկ մշակույթին» ուղեցույց լինելով կյանքի ամենաբազմազան ոլորտներում:

Թ) Երկու պարբերականներն էլ իրենց աշխարհիկ և հոգևոր գրվածքներով ազգին օգտակար իմացություններ տվեցին:

Ժ) Պարբերականների դիրքորոշման ընդհանուր ուղղությունը պահպանողական էր , ոչ միայն այն պատճառով , որ հրատարակիչները հոգևորականներ էին, այլև այդպիսին էր Պոլսում տիրող հասարակական ու քաղաքական մթնոլորտը:

Ի) Ազգի ավանդույթներից լեզուն ու կրոնը պահպանելուց բացի պարբերականները՝ մեծ տեղ հատկացրին նաև մարդասիրության, ազգասիրության և դաստիարակության խնդիրներին:

Լ) Դաստիարակությունը ոչ միայն ազգային խնդիր է, այլև տնտեսական ու քաղաքական, իսկ կրթության հետ միասին նաև ընկերային խնդիր է: Ահա թե ինչու պարբերականները կրթության ու դաստիարակության մեջ են տեսնում ազգի փրկության ճանապարհը:

Խ) Ազգային կրթությունը ըստ պարբերականների պետք է վերածել համազգային, զանգվածային կրթության, որը հնարավորություն կտա ազգին հասնելու ընդհանուր բարեկեցության:

Վերջում 9 մեքենագիր էջերով ներկայացված է օգտագործված հայ և օտարալեզու գրականությունն ու պարբերական մամուլը: Այսպիսով վերլուծելով ստենախոսի կատարած աշխատանքը, կարելի է եզրակացնել, որ կատարվել է մեծածավալ աշխատանք, որն ունի հարուստ բովանդակություն, շարադրված է գրագետ լեզվով, պարունակում է գիտական նորույթ: Սակայն կատարված այս դրվատելի, դրական աշխատանքում, տեղ է գտել մի քանի բացթողումներ և թերություններ որոնց կուզենայինք անդրադառնալ:

1. Ցանկալի կլիներ, որ հեղինակը բավական հանգամանորեն ներկայացներ նաև հայ ավետարանականների ներդրումը և վաստակը նոր հայերենի ձևավորման գործում, քանի որ նրանք իրենց ամսագրերում հատուկ ուշադրություն են դարձրել հայերենը թուրքական լեզվամտածողությունից ազատելու և այն հղկելու գործում:

2. Ատենախոսությունը կշահեր եթե աշխատանքի մեջ տեղ գտնեին նաև հետևյալ աշխատությունները.

- 2.1 Ղուկասյան Հ., Բողոքականությունը Կովկասում Հայոց մեջ, Թիֆլիս, Ա.հ., 1886:
- 2.2 Խառատյան Ա., Զմյուռնիայի հայ գաղթօջախը, Եր., Էդիթ պրինտ, 2008:
- 2.3 Տերոյան Վ., Իմպերիալիստական ծիծեռնակներ, Միսիոներաբարեգործական կազմակերպությունների աշխատանքը Մերձավոր Արևելքում և Անդրկովկասում, Եր., ՀՀ ԳԱԱ «Գիտություն» հրատ., 2008:

2.4 Քասունի Ե., Հայաստանյայց Ավետարանական Եկեղեցին, Բեյրութ, 1986:

2.5 Փայասյան Ստ., Ամերիկյան բողոքական միսիոներների գործունեությունն Արևմտյան Հայաստանում 19-րդ դարի սկզբից մինչև 1880-ական թվականների կեսերը, /թեկն. Ատենախոսություն/, Եր., 2007:

3. Հեղինակը Հայ ավետարանական եկեղեցու կրոնագիտական բոլոր հիմնավորումները փորձում է կառուցել միայն «Շտեմարան պիտանի գիտելաց»-ի վրա, սակայն հայտնի է, որ բողոքականներն այդ թվականներին հրատարակել են նաև այլ պարբերականներ՝ «Ավետաբեր», «Աւետաբեր մանկանց» և այլն, որոնց վերլուծությունները դուրս են մնացել հեղինակի ուշադրության կենտրոնից:


4. Ատենախոսության առանձին ենթագլուխներում (հատկապես առաջին գլխի 2-րդ և 3-րդ ենթագլուխներում) ավելի շատ գերակշռում է նկարագրական կողմը, որը աշխատության այդ մասին հաղորդում է փաստագրական բնույթ: Չնայած մյուս ենթագլուխներում վերլուծական կողմը գերակշռում է, ցանկալի կլիներ, որ այդ նույնը լիներ նաև նշված ենթագլուխներում:

5. Ատենախոսության լիարժեքությունն ապահովվելու և այն ընդհանրացված դարձնելու համար ցանկալի կլիներ, որպեսզի ատենախոսության գլուխներն ավարտվեին յուրաքանչյուր գլուխն ամփոփոխ եզրակացություններով, որոնք պետք է նշվեին կետերով, ինչպես եզրակացությունում է, որպեսզի ավելի պարզ ու հասկանալի լինի ընթերցողին:

6. Առանձին էջերում (էջ 14, 20, 26, 31, 47, 51, 92, 131, 134, 143, 150 և այլն) կան որոշ ոչ ճիշտ ձևակերպումներ, անհարթ մտքեր և ու արտահայտություններ, որոնք տեխնիկական բնույթի թերություններ են:

Նշված թերություններն ինչ խոսք չեն նսեմացնում Հարություն Սելիմյանի գիտական ուսումնասիրության արժանիքները:

Քննարկմանն ներկայացված ատենախոսությունը հետաքրքիր և բազմակողմանի ուսումնասիրություն է : Այն վկայում է հեղինակի գիտական հասունացման և բավականին բարդ հարցերին ինքնուրույն լուծումներ գտնելու հմտության մասին: Ատենախոսությունը լիովին բավարարում է թեկնածուական ատենախոսությանը ներկայացվող բոլոր պահանջներին, իսկ հեղինակը՝ Հարություն Գեորգիի Սելիմյանը լիովին արժանի է իր հայցած պատմական գիտությունների թեկնածուի գիտական աստիճանին:

Պաշտոնական ընդդիմախոս  պ.գ.դ, պրոֆեսոր Էդիկ Գարեգինի Մինասյան
Պ.գ.դ, պրոֆեսոր Էդ. Գ. Մինասյանի ստորագրությունը հաստատում եմ՝

ԵՊՀ գիտական քարտուղար  պ.գ. թ, դոցենտ Լևոն Սահակի Հովսեփյան

15.02.2021

